

DOMEINBEHEER CU E CONDICIONNAN PA POR PONE TRAILER

ORANJESTAD(AAN): -- Temporada di Carnaval ta den curpa y ta ora pa cuminsa prepara pa e periodo alegre y festivo aki.

Pesey Dienst Domeinbeheer a dicidi pa publica di awor caba e condicionnan pa por haya un perceel pa pone trailer, afdak o otro construccion como tambe esunnan cu e obhetonan aki mes mester cumpli cu ne.

1. Esun cu ta pidi e permiso pa e perceel mester paga esaki di antemano.

2. Esun cu tin e permiso, esta e vergunninghouder, no ta permiti pa duna esaki na

un otro persona o laga un otro usa e tereno.

Un persona por haya uno, dos o maximal tres kavel banda di otro, mientrastanto cu esun cu tin su kavel caba no tin derecho pa haya tereno pa pone trailer na otro sitio tambe.

3. Un persona cu tin dos o tres perceel banda di otro mester ocupa su tereno door di un solo trailer o afdak.

No ta permiti pa pone dos o tres diferente trailer riba e perceelnan aki.

4. E vergunninghouder mester wak pa e pone su trailer

riba un distancia di no menos cu dos meter di rand di caminda.

5. Pidanan di e trailer o cualkier otro construccion pa tapa solo no ta permiti di staka fuera di e perceel.

Tambe e vergunninghouder mester laga un distancia di dos meter entre e caminda y su perceel pa motibo cu e pida aki ta destina pa e publico na pia.

6. No ta permiti pa un trailer stroba o trese e libertad di trafico y di e publico na pia den peligro.

7. Ta prohibi pa snoei o destrui e matanan pa por

pone un trailer.

Nada por wordo poni den tera en coneccion cu cablenan, wayanan y tubonan cu por ta core ey bao.

8. E trailer o afdak mester ta den bon estado.

9. En caso di peligro pa motibo di e estado di e trailer o di mal construccion, e lo mester wordo movi.

Si e vergunninghouder nenga pa haci esaki, e trailer lo wordo hala riba su gastonan.

10. Si tin disturba cu liñanan di telefon o coriente o cu e tuberia di awa o riolering, e trailer mester move di ey mas lihe posible.

Esaki te cu e problema wordo resolve.

Si esaki tuma un dia o mas, esun cu tin e vergunning tin derecho riba su plaka back pa huur di e perceel pa e temporada ey di parti di Dienst Domeinbeheer.

11. Despues cu Carnaval pasa e vergunninghouder mester laga su perceel limpi atras sin sushi di cuminda, bebida o cualkiera otro sushi.

12. Si no wordo cumpli cu

e condicionnan, e vergunninghouder no tin derecho riba un perceel den e proximo aña.

13. E number di e kavel mester wordo poni como identificacion riba e trailer na un lugar cu ta visible for di caminda.

14. Benta di cuminda y bebida for di e perceel no ta permiti sin permiso exclusivo pa por haci esaki.

15. E vergunninghouder mester carga identificacion cu ne como cu a peticion di autoridadnan e mester por identifica su mes na cualkier momento.

16. E fecha di mas tarda pa tuma e perceel den uso ta diadomingo 12 di februari 1995.

Si e no ta ocupa pa mas laat riba e dia ey anto lo wordo asumi cu esun cu tin e permiso no tin interes pa usa e tereno.

E permiso ta wordo cancela e ora y e borg lo no wordo debolbe.

17. Ta permiti pa transporta e traileman riba caminda solamente entre 7'or di mainta y 7'or di anochi.